

Fundacion di MEP y e rol cu Betico Croes a hunga den dje

Movimiento Electoral di Pueblo MEP a ser fundá día 9 di Februari 1971 na cas di Betico Croes (qepd).

E organizacion polític aki consistiendo di personanan dínamico, capacítá y cu un amor grandi pa nan isla a ripará cu den trascurso di añanan e lucha di e pueblo Arubano pa su libertad a ser negligshá y poco poco tabata bayendo perdí.

Partidonan existente no tabata duna señal di por cumpli cu e anhelo cu tabata biba den curazón di tur Arubiano, esta di ta doño den nan mes cas.

Dignidad y e orguyo Arubano no tabata conta mas, nos cultura tabata ser tratá como algo insignificante y e polítca di antaño di segregacion ainda tabata dominá den e década aki.

E fundadornan di Movimiento Electoral di Pueblo (MEP) a dicidí cu mester bin un cambio den e polítca Arubano treciendo idealnan padilanti cu den nan realizacion lo bai beneficiá henter e comunidad Arubano.

Directamente despues di e fundacion di e partido nobo aki, e pueblo Arubano a comprendé e mensahe y e cambio radical cu e partido aki tabata propagandá. Despues di apenas tres luna di existencia Movimiento Electoral di Pueblo (MEP) a logra bai cu un tercera parti di e electorado

den e eleccion pa Eilandsraad.

Cu e resultado aki a keda demostrá cu e partido na manera convincente a ser aceptá dor di e pueblo Arubano y alavez esey tabata e empuhe pa e partido continuá cu su lucha na interes di e pueblo Arubano.

Pa por logra tur e idealnan riba e diferente terenonan den comunidad tabata necesario pa uni e pueblo aki.

Desde principio caba MEP bao liderazgo di su máximo lider Betico Croes qepd a vociferá e idea di union den e pueblo Arubano.

Un union cu a ser lográ dor di constantemente mobilizá e masa di pueblo.

Den tur e mobilisacionnan aki MEP tabata apelá riba e sentimento di patriotismo caminda e Arubiano sin distincion algun tabata ser poní central. Hustamente pa e motibo aki e pueblo Arubano a cuminzá sinti su mes orguyoso di ta Arubiano.

E cultura Arubano a bolbe rebibá desde fundacion di MEP. Nos tradicionnan manera Dande, Dera gai, nos Papiamento tradicional (etimológico) a haña nan lugá bek den comunidad.

Y e lider máximo Betico Croes tabata inculcá den nos hendenan e stimacion cu nan mester tin pa nan cultura y tradicionnan. Personalmente e mes tabata propagandá y

stimulá esey dor di pasa fin di aña cas pa cas treciendo nos cultura di Dande.

Otro punto realmente ta cu MEP a ser fundá dor di un movimiento di pueblo a base di principionan democrático y cu un sentimento social pa e bienestar di tur ciudadano.

Pa e motibo aki e partido a scohe e ideología social democrata pa alcanzá su metanan. Den partido un democracia bibo y real ta reina caminda cu mandato di pueblo, VOX POPULI, VOX DEI ta un lema hopi uzá den partido.

Socialmente e partido MEP semper a corda riba esnan menos afortuná den e comunidad y a duna oportunidad na un y tur cu kier desarroyá nan mes atravez di estudio.

Decenas di Arubiano a haña e oportunidad di sigui nan estudio den exterior y MEP ta e partido cu a percurá pa esey. Riba tereno económico MEP a percurá pa diversificá nos economía treciendo innumerable proyectonan pa e comunidad Arubano.

E tereno riba cual mas énfasis a ser poní riba dje ta e tereno estatal. Sin e parti aki Aruba hamas y nunca por a desarroyá su mes riba e otro terenonan ya mencioná. MEP cu na cabez Betico Croes a percurá pa realizacion di e Status Aparte y lo bai den

historia como e partido cu den apenas 15 aña di existencia a saca Aruba for di e constelacion Antiyano.

Pa por a duna contenido real na e anhelo di e pueblo Betico Croes qepd atravez di añanan a percurá pa e simbolonan di libertad, esta

Aruba su Himno y Bandera, Aruba su propio moneda, parlamento, gobierno, constitucion y su propio gobernador.

E logro riba tereno estatal no a bai sin e sacrificionan necesario di e gran lider qepd Betico Croes.